

**Namminersorlutik Oqartussat qitiusumik allaffeqarfiani taassumalu ataani
immikkoortortani nioqqutissanik kiffartuussinernillu pisineq pillugu kaajallaasitaq
oktober-ip 20-ni 2020-meersoq (Pisiortortarnermut kaajallaasitaq)**

Siunertaq

§ 1. Kaajallaasitami siunertaq tassaavoq aaqqissugaasumik suleriaaseqarnikkut, ataqatigiinnerusumik suleqatigiinnikkut kiisalu suliffeqarfiup iluani akisussaaffinnik erseqqissumik naleqquttumillu agguassinikkut Namminersorlutik Oqartussat pisiortornerannik pisariillisaanermik siuarsaanissaq.

Atuuffia

§ 2. Kaaviiartitaq Namminersorlutik Oqartussani nioqqutissanik kiffartuussinermillu pisiniartarnermut kr. 250.000-inik nalilimmu § 3 naapertorlugu immikkoortut eqqaassanngikkaanni tunngavoq. Qulaani taaneqartumik killissarititaasumik qaangiisoqarnissaanik naliliisoqarpat Pisortat oqartussaaffigisaanni suliffeqarfiinilu nioqqutissanik kiffartuussinernillu pisiniarnermut tunngatillugu neqerooruteqartitsisarneq pillugu Inatsisartut inatsisaat nr. 6, 12. juni 2019-imeersumi § 5 (Neqerooruteqartitsisarneq pillugu inatsit) atorlugu naatsorsuisoqassaaq.

Imm. 2. § 3-mi ilaatinneqanngitsut minillugit kaajallaasitami §§ 11-19 aamma pisiortornermut imm. 1-imi ilaanngitsunut atuuppoq, pisiniarnissamut akisussaasup immikkoortortap nalunaarutigippagu pisiniarneq Neqerooruteqartitsinermut kaajallaasitami § 12, imm. 1-imi taaneqartut neqerooruteqartitseriaatsit arlaat atorlugu ingerlanneqassaaq.

Imm. 3. Aammattaaq § 7, imm. 2 naapertorlugu pisiap annertussusaa apeqqutaatinnagu killiliussatut isumaqatigiissutit atorneqarnissaannut pisussaaffik atuutissaq.

Imm. 4. Inatsisilerinikkut aamma kukkunersuisarnikkut siunnersorneqarneq ikiorneqarnerlu Aningaasaqarnermut Naalakkersuisoqarfimmi Pisortamiit aammalu Naalakkersuisut Siulittaasuata Naalakkersuisoqarfiani Pisortamiit peqatigiillutik immikkut ittumik akuerineqarsinnaapput.

§ 3. Kaajallaasitamut ilaanngillat:

- 1) Sanaartornermi suliassat,
- 2) pisortani oqartussanit imaluunniit suliffeqarfinnit allaniit pisiniarnerit,
- 3) EU-mi inatsisilerinermi neqeroortitsinermut malittarisassiat najoqqutaralugit nunami EU-mi ilaasortaasumi pisortat peqatigalugit ataatsimoorullugit pisiniarnerit.
- 4) suliassamik isumaginnittussatut tapiissutinik pissarsisinnaatitaaneranik aningaasanut inatsimmi aalajangersagaasutut suliassat,
- 5) suliffeqarfiit namminersortitat, § 6-ili naapertorlugu isumaqatigiissuteqarfigineqarneranni tusarniarfigineqartussat,

- 6) nakorsaatinut atortunik taakkunungaluk atortussanik pisineq kr. 2.500.000-it ikinnerilluunniit nalinginut, kiisalu
- 7) sanaartornermi kr. 2.500.000-it nalinginik ikinnernilluunniit teknikkkut siunnersortimik ikiorteqarnissamut atorneqartussat.

Nassuiaatit

§ 4. "Namminersorlutik Oqartussat" ima paasineqassaaq, Naalackersuisut qitiusumik allaffeqarfiat tassanilu immikkoortortat.

Imm. 2. "Naalackersuisoqarfiit" ima paasineqassaaq Naalackersuisut qitiusumik allaffeqarfianni naalackersuisoqarfiit kiisalu Nakorsaaneqarfik.

Imm. 3. "Immikkoortut ataaniittut" ima paasineqassapput aqqissuussaanikkut immikkoortut missingersuutaat Namminersorlutik Oqartussat aningaasanut inatsisaanni atuutsinneqartut, matumani aqutsisoqarfiit, aqutsiviit, suliffeqarfiit, il.il. taamaattoq Kalaallit Nunaata nunani allani aallartitaqarfii kiisalu Danmarkimi sinniisuutitaqarfik minillugit.

Imm. 4. "Pisiniarneq" ima paasineqassaaq, nioqqutissanik imaluunniit kiffartuussinernik pisineq aamma nioqqutissanik imaluunniit kiffartuussinernik pisineq pillugu tunngaviusumik isumaqatigiissuteqarneq.

Imm. 5. "Immikkoortortaq pisiniarnermi akisussaasoq" ima paasineqassaaq, Namminersorlutik Oqartussani aqqissugaanermi immikkoortortaq pisinermik aalajangersimasumik naammassisaqarnermut atatillugu pisinerup ingerlanneqarneranik isumaginnittoq. Immikkoortortat pisinermi akisussaasut namminneq aamma/imaluunniit immikkoortortat allat sinnerlugit pisinernik isumaginnissinnaapput.

Imm. 6. "Atuisut" ima paasineqassaaq, Namminersorlutik Oqartussani aqqissugaanermi immikkoortortaq pisianik atuisussaaq.

Pisiortornermut Allaffik

§ 5. Pisiortornermut Allaffik (PP) Namminersorlutik Oqartussani pisinernik ingerlataqarnermut pingaarnertigut killiliussat aqqissuunneqarnerinut akisussaavoq, tassunga ilanngullugit qitiusumik ataqatigiissaarineq, neqerooruteqartitsinermi isumaqatigiissusiornermi najoqqutassaliorneq kiisalu pisiniarnermut ilitersuusiorneq.

Imm. 2. § 6, imm. 1 naapertorlugi PP aamma killiliussanik isumaqatigiissusiornermi pisiniarnermi akisussaasuussaaq.

Sinaakkutitut isumaqatigiissutit

§ 6. PP Namminersorlutik Oqartussanut tamarmiusumut atugassamik tunngaviusumik isumaqatigiissuteqassaaq. Killiliussanik isumaqatigiissuteqarnissaq sioqqullugu PP-p

suliffeqarfiit namminersortitat isumaqatigiissummut ilaarusunnersut Inatsisartut Siulittaasoqarfiat tusarniassavai.

Imm. 2. Namminersorlutik Oqartussat PP-mit tunngaviusumik isumaqatigiissummi isumaqatigiissutigineqarsimasut atussavaat, sullissineq kissaatigineqartoq taamaattumik ilaappat. Pisussaaffik taanna tunngaviusumik isumaqatigiissutinut tamanut atuuppoq.

Imm. 3. Tunngaviusumik isumaqatigiissutaasimasunik atuinissamut imm. 2-mi pisussaaffimmit taaneqartumiit suliffeqarfiit namminersortitat ilaatinneqanngillat, imm. 1 naapertorlugu ilaaniarlutik nalunaaruteqarsimanngippata.

Imm. 4. Imm. 2-mi nangaassuteqarluni pisinerit Namminersorlutik Oqartussanit imaluunniit Namminersorlutik Oqartussat ilaannit, Statens & Kommunernes Indkøbs Service (SKI) imaluunniit Statens Indkøb-imit tunngaviusumik isumaqatigiissummi atuuttumiittut kaajallaasitap aalajangersagaanit ilaatinneqanngillat, tassunga ilanngullugu pisinissamik pisariaqartitsineq pillugu naliliineq, takuuk § 9, imm. 1.

Tunngaviusumik isumaqatigiissut avaqqullugu pisinerit

§ 7. Tunngaviusumik isumaqatigiissummut ilaannigitsunik nammineq pisinerminnut naalackersuisoqarfiit taakkunanilu immikkoortortat akisussaapput.

Imm. 2. Imm. 1 naapertorlugu pisineri allagaatit atulersinnissaat sioqqullugu neqerooruteqartitsineri isumaqatigiissummilu allagaatit pitsaassusii qulakkeerniarlugit pisinissamut akisussaasup immikkoortortap PP-mut nassiussinnaavai. Immikkoortortaq tamatuminnga noqqaappat PP siunnersueqqinnermik ilitersuussinnermillu ikiuussinnaavoq.

Pisinissap pilersaarusiornera

§ 8. Namminersorlutik Oqartussani assingusumik pisariaqartitsisinnanernut ataqatigiissitsinissaq siunertaralugu naalackersuisoqarfinni ataasiakkaani taassumalu immikkoortortaani ukiup tulliani pisinissamut pisariaqartitsineri nalilersuineq naalackersuisoqarfinni ukiumoortumik ingerlanneqartassaaq.

Imm. 2. Naalackersuisoqarfiit Ilanngussa A immersussavaat pisassami nalingi allallugit, matumanilu suuneri, qaqugu tunniunneqarnissaannut naatsorsuutiginerlugu qanorlu akeqassanersut kingusinnerpaamillu 1. december PP-mut nassiullugu.

Imm. 3. Ilanngussa A tiguneqartut tunuliaqutaralugit ukiumi pisiassanut pilersaarummik ataatsimoortumik PP suliaqartassaaq. Pisinernut ataasiakkaanut pilersaarummit uku takuneqarsinnaassapput:

- 1) pisat suuneri,
- 2) piffissaq tunniussiffiusussatut naatsorsuutigisaaq, aamma
- 3) akigititassatut naatsorsuutigisaaq.

Imm. 4. PP kingusinnerpaamik 1. januaarimi imm. 3-mi taaneqartumut pilersaarummut missingiut oqaaseqarfigisassanngorlugu naalackersuisoqarfinnut saqqummiutissavaa.

Imm. 5. Naalackersuisoqarfiit missingiummut oqaaseqaatigisinnaasatik PP-mut kingusinnerpaamik 15. januaarimi nassiutissavaat, takuuk imm. 4,

Imm. 6. PP kingusinnerpaamik 1. februaarimi inaarutaasumik pilersaarut naalackersuisoqarfinnut nassiutissavaa, takuuk imm. 3,

Imm. 7. Imm. 6-imi taaneqartumi inaarutaasumik pilersaarut aallaavigalugu Namminersorlutik Oqartussat pisiassatut naatsorsuutigisaat pillugit takussutissiamik PP suliaqassaaq. Pisortat ataatsimut neqeroortitsisarfiata nittartakkami takussutissartaa PP-p kingusinnerpaamik 15. februarimi tamanut saqqummiutissavaa.

§ 9 § 8, imm. 2, naapertorlugu nalunaarutigineqarsimannngitsunik ukiup ingerlanerani pisinissamik pisariaqartitsisoqalissappat taakkulu 500.000 DKK sinnerlugit naleqarpata pisinissamik pisariaqartitsineq pillugu PP ilisimatinneqassaaq.

Imm. 2. Imm. 1-imi taaneqartumut ilisimatitsinerup nanginneratut, taamaaqataanik pisariaqartitsinerit paasineqarnissaat aamma pisinissamut pilersaarutaareersunik ataqatigiissarinissaq siunertaralugu Namminersorlutik Oqartussat immikkoortuini allani PP tusarniaanermik ingerlataqassaaq.

Pisinissap piareersarnera

§ 10. Immikkoortortaq 250.000 kr. sinnerlugit pisinissamut akisussaasoq pisinerit ataasiakkaat tamaasa sioqqullugit ilaatigut neqerooruteqartitseriaatsit tulluernerpaat toqqarneqarnissaat, ilaatigullu tulluurtumik sullissinerup allaaserinera/piumasaqaatit immikkoortiternerisa oqaasertalersinnaaneri siunertaralugit niuerfinnik misissuissaaq.

Imm. 2. Niuerfinnik misissuineq allakkiakkut uppernarsarneqassaaq.

Imm. 3. Pilersuisut naleqquttut sorliit niuerfimmi piunersut, matumani najukkami kalaallinik pilersuisoqarnerisooq allakkiami takuneqarsinnaassapput.

Imm. 4. Niuerfinnilli misissuineq pinngitsoortinneqarsinnaavoq ukiut siuliisa pingasut ingerlaneranni assingusumik niuerfinnik misissuisoqarsimappat, nalilerneqarlunilu niuerfik taamanili annertuumik allannngorsimannngitsoq.

Imm. 5. Niuerfinnik oqaloqateqarneq imm. 1 naapertorlugu isumaqatigiinniarnertut iluseqassanngilaq imaluunniit allatigut imatut kinguneqarluni suliffeqarfiit ataasiakkaat salliutinneqarnissaat anguneqarluni.

§ 11. Pisinissamut akisussaasoq immikkoortortaq pisinerit ataasiakkaat tamaasa sioqqullugit eqqarsaatigissavaa isumaqatigiisummik pissarsiniarlutik 250.000-init amerlanernilluunniit uuttuutit suut tunngavigalugit pilersuisut unammilleqatigiissanersut.

Imm. 2. Unammilleqatigiinnermi uuttuutit uku tamatigut eqqarsaatigineqartariaqarput:

- 1) tamakkiisumik aningaasartuutit,
- 2) pitsaassuseq, aamma
- 3) tunniussinissap sivilissusaa.

§ 12. Immikkoortortaq pisinissamut akisussaasoq pisinerit ataasiakkaat tamaasa sioqqullugit naliliissaaq pisinermut atatillugu sumiiffigisami tunngaveqarnissaa pillugu

piumasaqaateqarnissaq tulluarnersoq. Sulisutigut piginnaasanillu ineriartortitsineq aqqutigalugu najukkani inuussutissarsiorderup ineriartornerata tapersorsornissaa siunertaavoq. *Imm. 2.* Imm. 1-imi taaneqartoq eqqarsaatigisassaq ilaatigut tunniussinissamut piumasaqaateqarnikkut imaluunniit uku pillugit isumaqatigiissutikkut piumasaqaateqarnikkut naammassineqarsinnaapput:

- 1) Kalaallit Nunaanni sumiiffimmi ikiorserneqarsinnaaneq, tassunga ilanngullugu toqqorsivimmiit tunniussinissap sivilissusissaa il.il.
- 2) sumiiffimmi najuuttoqarnissaanik pisariaqartitsisumik aggersaanerup sivilissusaa,
- 3) kalaallit oqaasiisigut piginnaasat, aamma
- 4) ilinniartinnik il.il. pilersitsineq.

§ 13. Immikkoortortap pisinissamut akisussaasuusup pisinerit ataasiakkaat tamaasa sioqqullugit nalilissavaa CSR-imi piumasaqaateqarnissaq tulluarnersoq, kiisalu taamaattoqassappat ”akit pitsaassutsillu akornanni pissutsinut pitsaanerpaanut” tunniussinissamut piumasaqaatinut imaluunniit isumaqatigiissummi piumasaqaatitullu tulluarnermut minnerpaamik piumasaqaateqartoqassanersoq.

Imm. 2. CSR-imi piumasaqaateqarneq assersuutigalugu ukununga tunngasinnaavoq:

- 1) ilinniartunut, ilinniarnermut aamma suliffimmi misiliinermi inissamik pilersitsineq,
- 2) sivilissumik suliffeqanngitsunik imaluunniit sulisunik killeqartumik sulisinnaassusilinnik, innarluuteqartunik il.il. sulilersitsineq, imaluunniit
- 3) avatangiisinut ajoqusiinngitsumik piujuartitsisumillu aqqiinerit.

Pisinerit naammassineqarneri

§ 14. Pisinerit Neqeroorteqartitsinermik inatsit malillugu pisassapput.

§ 15. Pisiortornermi PP-p neqeroortitsinermut isumaqatigiissuteqarnermullu immersugassaatai atorneqassapput. Immersugassat pisariniakkanut aalajangersimasunut naleqqussarneqassapput.

§ 16. Pisiniarnermi immikkoortut arlaqartut ilaatinneqarpata immikkoortumi pisiniarnermi akisussaasup taakku attavigissavai pisaraiqarneratullu peqataatillugit.

Pisinerit malitseqartitsineri

§ 17. Immikkoortortap pisinissamut akisussaasup sullissineq pisarineqartoq piffissami isumaqatigiissutigineqartumi, annertussutsinut isumaqatigiissutigineqartunut, pitsaassutsinut isumaqatigiissutigineqartunut akinullu isumaqatigiissutigineqartunut tunniunneqarnerisut misissussavai.

Imm. 2. Immikkoortortaq tamatuminnga noqqaappat PP siunnersueqqinnermik ilitsersuussinermillu ikiuussinnaavoq.


Atortuulerfia

§ 18. Kaajallaasitaq ulloq 20-ni oktober-imeersoq 2020 Namminersorlutik Oqartussani qitiusumik allaffeqarfiani taassumalu ataani immikkoortortani pisiniartarnermut kiffartuussisarnermullu kaajallaasitaq 24. september 2010-meersoq taarserlugu atuutilissaaq.

Naalackersuisut Siulittaasuata Naalackersuisoqarfia, ulloq 20.oktober 2020



Kim Kielsen



Hans-Peder Barlach Christensen

Ilanngussat

Ilanngussaq A - Pisiarineqartussatut naatsorsuutigisat pillugit nalunaarut